

## 【藥師琉璃光如來本願功德經】

### 爐香讚 (彌陀印)

爐香乍熱，法界蒙薰，諸佛海會悉遙聞，隨處結祥雲。誠意方殷，諸佛現全身。

南無香雲蓋菩薩摩訶薩(三稱)。

### 南無本師釋迦牟尼佛(觀音印或彌陀印)

### 藥師如來真言 (三遍，藥師佛召請印)

爹雅他。唵。別卡子也。別卡子也。媽哈別卡子也。辣炸娑摩伽德黑。  
梭哈。

### (恭請諸佛菩薩，藥師佛召請印)

南無藥師琉璃光如來

南無日光徧照菩薩

南無月光徧照菩薩

南無文殊室利菩薩

南無觀世音菩薩

南無大勢至菩薩

南無無盡意菩薩

南無寶檀花菩薩

南無藥王菩薩

南無藥上菩薩

南無彌勒菩薩

奉請宮毗羅大將

奉請伐折羅大將

奉請迷企羅大將

奉請安底羅大將

奉請頰你羅大將

奉請珊底羅大將

奉請因達羅大將

奉請波夷羅大將

奉請摩虎羅大將

奉請真達羅大將

奉請招杜羅大將

奉請毗羯羅大將

南無藥師會上佛菩薩

南無諸佛如來菩薩摩訶薩

**(供養諸佛菩薩，真言各三遍，供養印)**

**變食真言**

南無薩縛怛他哦哆。縛嚕枳帝。唵。三跋囉。三跋囉。三跋囉。吽。

## 普供養真言

唵。哦哦曩。三婆縛。伐日囉。斛。(供品第一為食物，若逢年節可改為節慶供品如年糕、發糕、粽子、糖果、第二次為水果，第三次為珍寶，如珍珠、鑽石等。)

## 開經偈

無上甚深微妙法，百千萬劫難遭遇。

我今見聞得受持，願解如來真實義。

如是我聞：一時薄伽梵，遊化諸國，至廣巖城，住樂音樹下。與大比丘眾八千人俱，菩薩摩訶薩三萬六千，及國王、大臣，婆羅門、居士，天龍八部，人非人等，無量大眾，恭敬圍繞，而為說法。

爾時、曼殊室利法王子，承佛威神，從座而起，偏袒一肩，右膝著地，向薄伽梵，曲躬合掌。向言：世尊！惟願演說如是相類諸佛名號，及本大願殊勝功德，令諸聞者業障消除，為欲利樂像法轉時諸有緣故。

爾時、世尊讚曼殊室利童子言：善哉！善哉！曼殊室利！汝以大悲，勸請我說諸佛名號，本願功德，為拔業障所纏有緣，利益安樂像法轉時諸有緣故。汝今諦聽！極善思惟！當為汝說。曼殊室利言：唯然，願說！我等樂聞！

佛告曼殊師利：東方去此，過十殑伽沙等佛土，有世界名淨琉璃，佛號藥師琉璃光如來，應、正等覺、明行圓滿、善逝、世間解、無上士、調御丈夫、天人師、佛、薄伽梵。曼殊室利！彼世尊藥師琉璃光如來

本行菩薩道時，發十二大願，令諸有緣，所求皆得。第一大願：願我來世，得阿耨多羅三藐三菩提時，自身光明熾然照耀無量無數無邊世界，以三十二大丈夫相、八十隨形莊嚴其身，令一切有緣如我無異。第二大願：願我來世得菩提時，身如琉璃，內外明徹，淨無瑕穢；光明廣大，功德巍巍，身善安住，燄網莊嚴過於日月；幽冥眾生，悉蒙開曉，隨意所趣，作諸事業。第三大願：願我來世得菩提時，以無量無邊智慧方便，令諸有緣皆得無盡所受用物，莫令眾生，有所乏少。第四大願：願我來世得菩提時，若諸有緣行邪道者，悉令安住菩提道中；若行聲聞獨覺乘者，皆以大乘而安立之。第五大願：願我來世得菩提時，若有無量無邊有緣，於我法中修行梵行，一切皆令得不缺戒、具三聚戒；設有毀犯，聞我名已還得清淨，不墮惡趣！第六大願：願我來世得菩提時，若諸有緣，其身下劣，諸根不具，醜陋、頑愚、盲、聾、瘖、啞、攣躄、背偻、白癩、顛狂、種種病苦；聞我名已，一切皆得端正黠慧，諸根完具，無諸疾苦。第七大願：願我來世得菩提時，若諸有緣眾病逼切，無救無歸，無醫無藥，無親無家，貧窮多苦；我之名號一經其耳，眾病悉除，身心安樂，家屬資具悉皆豐足，乃至證得無上菩提。第八大願：願我來世得菩提時，若有女人為女百惡之所逼惱，極生厭離，願捨女身；聞我名已，一切皆得轉女成男，具丈夫相，乃至證得無上菩提。第九大願：願我來世得菩提時，令諸有緣出魔羂網，解脫一切外道纏縛；若墮種種惡見稠林，皆當引攝置於正見，漸令修習諸菩薩行，速證無上正等菩提！第十大願：願我來世得菩提時，若諸有緣王法所加，縛錄鞭撻，繫閉牢獄，或當刑戮，及餘無量災難凌辱，悲愁煎逼，身心受苦；若聞我名，以我福德威神力故，皆得解脫一切憂苦！第十一大願：願我來世得菩提時，若諸有緣饑渴所惱，為求食故造諸惡業；得聞我名，專念受持，我當先以上妙飲食飽足其身，後以法味畢竟安樂而建立之。第十二大願：願我來世得菩

提時，若諸有緣貧無衣服，蚊虻寒熱，晝夜逼惱；若聞我名，專念受持，如其所好，即得種種上妙衣服，亦得一切寶莊嚴具，華鬘、塗香，鼓樂眾伎，隨心所習，皆令滿足。曼殊室利！是為彼世尊藥師琉璃光如來、應、正等覺行菩薩道時，所發十二微妙上願。

復次、曼殊室利！彼世尊藥師琉璃光如來行菩薩道時，所發大願，及彼佛土功德莊嚴，我若一劫、若一劫餘，說不能盡。然彼佛土，一向清淨，無有女人，亦無惡趣，及苦音聲；琉璃為地，金繩界道，城、闕、宮、閣，軒、窗、羅網，皆七寶成；亦如西方極樂世界，功德莊嚴，等無差別。於其國中，有二菩薩摩訶薩：一名日光遍照，二名月光遍照。是彼無量無數菩薩眾之上首，次補佛處，悉能持彼世尊藥師琉璃光如來正法寶藏。是故曼殊室利！諸有信心善男子、善女人，應當願生彼佛世界。

爾時、世尊復告曼殊室利童子言：曼殊室利！有諸眾生，不識善惡，惟懷貪吝，不知布施及施果報，愚癡無智，闕於信根，多聚財寶，勤加守護。見乞者來，其心不喜，設不獲已而行施時，如割身肉，深生痛惜。復有無量慳貪有緣，積集資財，於其自身尚不受用，何況能與父母、妻子、奴婢作使，及來乞者？彼諸有緣，從此命終生餓鬼界，或傍生趣。由昔人間曾得暫聞藥師琉璃光如來名故，今在惡趣，暫得憶念彼如來名，即於念時從彼處沒，還生人中；得宿命念，畏惡趣苦，不樂欲樂，好行惠施，讚歎施者，一切所有悉無貪惜，漸次尚能以頭目手足血肉身分施來求者，況餘財物。

復次、曼殊室利！若諸有緣，雖於如來受諸學處，而破尸羅；有雖不破尸羅而破軌則；有於尸羅、軌則，雖得不壞，然毀正見；有雖不毀正見而棄多聞，於佛所說契經深義不能解了；有雖多聞而增上慢，由增上慢覆蔽心故，自是非他，嫌謗正法，為魔伴黨。如是愚人，自行邪見，復令無量俱胝有緣，墮大險坑。此諸有緣，應於地獄、傍生、

鬼趣，流轉無窮。若得聞此藥師琉璃光如來名號，便捨惡行，修諸善法，不墮惡趣。設有不能捨諸惡行、修行善法，墮惡趣者，以彼如來本願威力，令其現前暫聞名號，從彼命終還生人趣。得正見精進，善調意樂，便能捨家趣於非家；如來法中，受持學處無有毀犯；正見多聞，解甚深義；離增上慢，不謗正法，不為魔伴；漸次修行諸菩薩行，速得圓滿。

復次、曼殊室利！若諸有緣慳貪、嫉妒，自讚毀他，當墮三惡趣中，無量千歲受諸劇苦！受劇苦已，從彼命終，來生人間，作牛、馬、駝、驢，恆被鞭撻，饑渴逼惱，又常負重隨路而行。或得為人，生居下賤，作人奴婢，受他驅役，恆不自在。若昔人中曾聞世尊藥師琉璃光如來名號，由此善因，今復憶念，至心歸依。以佛神力，眾苦解脫，諸根聰利，智慧多聞，恆求勝法，常遇善友，永斷魔羂，破無明殼，竭煩惱河，解脫一切生老病死憂愁苦惱。

復次、曼殊利室！若諸有緣好喜乖離，更相鬥訟，惱亂自他，以身語意，造作增長種種惡業，展轉常為不饒益事。互相謀害，告召山林樹塚等神；殺諸眾生，取其血肉祭祀藥叉、羅剎婆等；書怨人名，作其形像，以惡咒術而咒詛之；厭魅蠱道，咒起屍鬼，令斷彼命，及壞其身。是諸有緣，若得聞此藥師琉璃光如來名號，彼諸惡事悉不能害。一切展轉皆起慈心，利益安樂，無損惱意及嫌恨心。各各歡悅，於自所受生於喜足，不相侵凌互為饒益。

復次、曼殊室利！若有四眾：苾芻、苾芻尼、鄔波索迦、鄔波斯迦，及餘淨信善男子、善女人等，有能受持八分齋戒，或經一年、或復三月受持學處，以此善根，願生西方極樂世界無量壽佛所，聽聞正法而未定者。若聞世尊藥師琉璃光如來名號，臨命終時，有八大菩薩，其名曰：文殊師利菩薩，觀世音菩薩，大勢至菩薩，無盡意菩薩，寶檀

華菩薩，藥王菩薩，藥上菩薩，彌勒菩薩。是八大菩薩乘空而來，示其道路，即於彼界種種雜色眾寶華中，自然化生。

或有因此，生於天上，雖生天上，而本善根，亦未窮盡，不復更生諸餘惡趣。天上壽盡，還生人間。或為輪王，統攝四洲，威德自在，安立無量百千有緣於十善道；或生刹帝利、婆羅門、居士大家，多饒財寶，倉庫盈溢，形相端正，眷屬具足，聰明智慧，勇健威猛，如大力士。若是女人，得聞世尊藥師琉璃光如來名號，至心受持，於後不復更受女身。

復次、曼殊室利！彼藥師琉璃光如來得菩提時，由本願力，觀諸有緣，遇眾病苦瘦癯、乾消、黃熱等病；或被厭魅、蠱毒所中；或復短命，或時橫死；欲令是等病苦消除所求願滿。

時彼世尊，入三摩地，名曰除滅一切眾生苦惱。既入定已，於肉髻中出大光明，光中演說，大陀羅尼曰：

### **藥師灌頂真言五遍，藥師印**

南無薄伽伐帝。鞞薩社。具嚕薛琉璃。鉢喇婆。喝囉闍也。怛陀揭多耶。阿羅訶帝。三藐三勃陀耶。怛姪他。唵。鞞殺逝。鞞殺逝。鞞殺社。三沒揭帝。娑訶。

### **消解病咒五遍，藥師印**

唵。室哩哆。室哩哆。暉吒唎。娑訶。

爾時、光中說此咒已，大地震動，放大光明，一切眾生病苦皆除，受安穩樂。曼殊室利！若見男子、女人有病苦者，應當一心，為彼病人，常清淨澡漱，或食、或藥、或無蟲水、咒一百八遍，與彼服食，所有

病苦悉皆消滅。若有所求，志心念誦，皆得如是。無病延年，命終之後，生彼世界，得不退轉，乃至菩提。是故曼殊室利！若有男子、女人，於彼藥師琉璃光如來，至心殷重，恭敬供養者，常持此咒，勿令廢忘。

復次、曼殊室利！若有淨信男子女人，得聞藥師琉璃光如來應正等覺所有名號，聞已誦持。晨嚼齒木，澡漱清淨。以諸香花，燒香、塗香，作眾伎樂，供養形象。於此經典，若自書，若教人書，一心受持，聽聞其義。於彼法師，應修供養，一切所有資身之具，悉皆施與，勿令乏少。如是便蒙諸佛護念，所求願滿，乃至菩提。

爾時、曼殊室利童子向佛言：世尊！我當誓於像法轉時，以種種方便，令諸淨信善男子、善女人等，得聞世尊藥師琉璃光如來名號，乃至睡中亦以佛名覺悟其耳。世尊！若於此經受持讀誦，或復為他演說開示，若自書、若教人書。恭敬尊重，以種種華香、塗香、末香、燒香、花鬘、瓔珞、幡蓋、伎樂，而為供養。以五色綵，作囊盛之，掃灑淨處，敷設高座，而用安處。爾時、四大天王與其眷屬，及餘無量百千天眾，皆詣其所，供養守護。世尊！若此經寶流行之處，有能受持，以彼世尊藥師琉璃光如來本願功德，及聞名號，當知是處無復橫死，亦復不為諸惡鬼神奪其精氣。設已奪者，還得如故，身心安樂。

佛告曼殊室利：如是！如是！如汝所說。曼殊室利！若有淨信善男子、善女人等，欲供養彼世尊藥師琉璃光如來者，應先造立彼佛形像，敷清淨座而安處之。散種種花，燒種種香，以種種幢幡莊嚴其處。七日七夜，受八分齋戒。食清淨食，澡浴香潔，著清淨衣。應生無垢濁心、無怒害心；於一切有緣起利益安樂，慈悲喜捨平等之心。鼓樂歌讚，右遶佛像。復應念彼如來本願功德，讀誦此經，思惟其義，演說開示，隨所樂求，一切皆遂：求長壽，得長壽，求富饒，得富饒，求官位得官位，求男女得男女。



若復有人，忽得惡夢，見諸惡相，或怪鳥來集，或於住處百怪出現。此人若以眾妙資具，恭敬供養彼世尊藥師琉璃光如來者，惡夢、惡相諸不吉祥，皆悉隱沒，不能為患。或有水、火、刀、毒、懸險、惡象、獅子、虎、狼、熊、羆、毒蛇、惡蠍、蜈蚣、蚰蜒、蚊、虻等怖，若能至心憶念彼佛，恭敬供養，一切怖畏皆得解脫。若他國侵擾，盜賊反亂，憶念恭敬彼如來者，亦皆解脫。

復次、曼殊室利！若有淨信善男子、善女人等，乃至盡形不事餘天，唯當一心，歸佛法僧，受持禁戒：若五戒、十戒，菩薩四百戒、苾芻二百五十戒，苾芻尼五百戒。於所受中或有毀犯，怖墮惡趣，若能專念彼佛名號，恭敬供養者，必定不受三惡趣生。或有女人，臨當產時，受於極苦；若能志心稱名禮讚，恭敬供養彼如來者，眾苦皆除。所生之子，身分具足，形色端正，見者歡喜，利根聰明，安穩少病，無有非人，奪其精氣。

爾時、世尊告阿難言：如我稱揚彼世尊藥師琉璃光如來所有功德，此是諸佛甚深行處，難可解了，汝為信不？阿難向言：大德世尊！我於如來所說契經不生疑惑，所以者何？一切如來身語意業無不清淨。世尊！此日月輪可令墮落，妙高山王可使傾動，諸佛所言無有異也。世尊！有諸眾生，信根不具，聞說諸佛甚深行處，作是思惟：云何但念藥師琉璃光如來一佛名號，便獲爾所功德成就？由此不信，還生誹謗。彼於長夜失大利樂，墮諸惡趣，流轉無窮！佛告阿難：是諸有緣若聞世尊藥師琉璃光如來名號，至心受持，不生疑惑，墮惡趣者無有是處。阿難！此是諸佛甚深所行，難可信解；汝今能受，當知皆是如來威力。阿難！一切聲聞、獨覺，及未登地諸菩薩等，皆悉不能如實信解，唯除一生所繫菩薩。阿難！人身難得；於三寶中，信敬尊重，亦難可得；聞世尊藥師琉璃光如來名號，復難於是。阿難！彼藥師琉璃光如來，

無量菩薩行，無量善巧方便，無量廣大願；我若一劫，若一劫餘而廣說者，劫可速盡，彼佛行願，善巧方便無有盡也！

爾時、眾中有一菩薩摩訶薩，名曰救脫，即從座起，偏袒一肩，右膝著地，曲躬合掌而向佛言：大德世尊！像法轉時，有諸眾生為種種患之所困厄。長病羸瘦，不能飲食，喉唇乾燥，見諸方暗，死相現前。父母、親屬、朋友、知識啼泣圍繞，然彼自身臥在本處，見琰魔法使，引其神識至於琰魔法王之前。然諸有緣，有俱生神，隨其所作，若罪若福，皆具書之，盡持授與琰魔法王。爾時、彼王推問其人，計算所作，隨其罪福而處斷之。時彼病人親屬、知識，若能為彼歸依世尊藥師琉璃光如來，請諸眾僧，轉讀此經，然七層之燈，懸五色續命神旛，或有是處彼識得還，如在夢中明了自見。或經七日，或二十一日，或三十五日，或四十九日，彼識還時，如從夢覺，皆自憶知善不善業所得果報，由自證見業果報故，乃至命難，亦不造作諸惡之業。是故淨信善男子善女人等，皆應受持藥師琉璃光如來名號，隨力所能，恭敬供養。

爾時、阿難問救脫菩薩曰：善男子！應云何恭敬供養彼世尊藥師琉璃光如來？續命旛燈復云何造？救脫菩薩言：大德！若有病人，欲脫病苦，當為其人，七日七夜受持八分齋戒。應以飲食及餘資具，隨力所辦，供養苾芻僧。晝夜六時，禮拜供養彼世尊藥師琉璃光如來。讀誦此經四十九遍。然四十九燈；造彼如來形像七軀，一一像前各置七燈，一一燈量大如車輪，乃至四十九日光明不絕；造五色綵旛，長四十九褶手；應放雜類眾生至四十九；可得過度危厄之難，不為諸橫惡鬼所持。

復次、阿難！若剎帝利、灌頂王等，災難起時，所謂：人眾疾疫難，他國侵逼難，自界叛逆難，星宿變怪難，日月薄蝕難，非時風雨難，過時不雨難。彼剎帝利灌頂王等，爾時應於一切有緣起慈悲心，赦諸

繫閉。依前所說供養之法，供養彼世尊藥師琉璃光如來。由此善根及彼如來本願力故，令其國界即得安穩，風雨順時，穀稼成熟，一切有緣無病歡樂。於其國中，無有暴惡藥叉等神惱有緣者，一切惡相皆即隱沒。而刹帝利灌頂王等壽命色力，無病自在，皆得增益。阿難！若帝后、妃主，儲君、王子，大臣、輔相，中宮、綵女，百官、黎庶，為病所苦，及餘厄難。亦應造立五色神旛，然燈續明，放諸生命，散雜色花，燒眾名香。病得除愈，眾難解脫。

爾時，阿難問救脫菩薩言：善男子！云何已盡之命而可增益？救脫菩薩言：大德！汝豈不聞如來說有九橫死耶？是故勸造續命旛燈，修諸福德，以修福故，盡其壽命不經苦患。阿難問言：九橫云何？救脫菩薩言：若諸有緣，得病雖輕，然無醫藥及看病者，設復遇醫，授以非藥，實不應死而便橫死。又信世間邪魔、外道、妖孽之師妄說禍福，便生恐動。心不自正，卜問覓禍，殺種種眾生，解奏神明，呼諸魍魎，請乞福祐，欲冀延年，終不能得。愚癡迷惑，信邪倒見，遂令橫死入於地獄，無有出期，是名初橫。二者、橫被王法之所誅戮。三者、畋獵嬉戲，耽淫嗜酒，放逸無度，橫為非人奪其精氣。四者、橫為火焚。五者、橫為水溺。六者、橫為種種惡獸所噉。七者、橫墮山崖。八者、橫為毒藥、厭禱、咒詛、起屍鬼等之所中害。九者、饑渴所困，不得飲食而便橫死。是為如來略說橫死有此九種，其餘復有無量諸橫，難可具說！

復次、阿難！彼琰魔王主領世間名籍之記，若諸有緣，不孝五逆，破辱三寶，壞君臣法，毀於性戒，琰魔法王隨罪輕重，考而罰之。是故我今勸諸有緣，然燈造旛，放生修福，令度苦厄，不遭眾難。

爾時、眾中有十二藥叉大將，俱在會坐，所謂：宮毘羅大將，伐折羅大將，迷企羅大將，安底羅大將，頰你羅大將，珊底羅大將，因達羅大將，波夷羅大將，摩虎羅大將，真達羅大將，招杜羅大將，毘羯羅

大將。此十二藥叉大將，一一各有七千藥叉，以為眷屬。同時舉聲向佛言：世尊！我等今者蒙佛威力，得聞世尊藥師琉璃光如來名號，不復更有惡趣之怖。我等相率，皆同一心，乃至盡形歸佛法僧，誓當荷負一切有緣，為作義利，饒益安樂。隨於何等村城國邑，空閑林中，若有流布此經，或復受持藥師琉璃光如來名號恭敬供養者，我等眷屬衛護是人，皆使解脫一切苦難，諸有願求悉令滿足。或有疾厄求度脫者，亦應讀誦此經，以五色縷，結我名字，得如願已，然後解結。爾時、世尊讚諸藥叉大將言：善哉！善哉！大藥叉將！汝等念報世尊藥師琉璃光如來恩德者，常應如是利益安樂一切有緣。爾時、阿難向佛言：世尊！當何名此法門？我等云何奉持？佛告阿難：此法門名說藥師琉璃光如來本願功德；亦名說十二神將饒益有緣結願神咒；亦名拔除一切業障應如是持！

時薄伽梵，說是語已，諸菩薩摩訶薩，及大聲聞，國王、大臣、婆羅門、居士、天龍、藥叉、健達縛、阿素洛、揭路荼、緊捺洛、莫呼洛伽、人、非人等一切大眾，聞佛所說，皆大歡喜，信受奉行。

~藥師琉璃光如來本願功德經終~

### 解冤咒(三遍，解冤印)

唵。三陀囉。伽陀娑婆訶。

### 藥師讚

藥師會上，琉璃光王。八大菩薩降吉祥，七佛護壇場。日月威光，滅罪免災殃。藥師大願，功德無邊，大千沙界盡包含，寶地佈金蓮。我佛弘宣，福壽廣增延。

## 南無藥師海會佛菩薩摩訶薩(三稱)

### 三皈依

自皈依佛，當願眾生；體解大道，發無上心。

自皈依法，當願眾生；深入經藏，智慧如海。

自皈依僧，當願眾生；統理大眾，一切無礙。和南聖眾。